



NEGERI TERENGGANU

TAMBAHAN PERUNDANGAN

AKTA KERAJAAN TEMPATAN 1976 [AKTA 171]

Tr. P.U. 1/93

UNDANG-UNDANG KECIL TAMAN (MAJLIS DAERAH KEMAMAN) 1992

Tarikh penyiaran :
Tarikh mula kuat kuasa :

21 Januari 1993
21 Januari 1993

SUSUNAN UNDANG-UNDANG KECIL

[Mukadimah.](#)

- Undang-undang Kecil 1. [Nama, pemakaian dan mula berkuatkuasa.](#)
- Undang-undang Kecil 2. [Tafsiran.](#)
- Undang-undang Kecil 3. [Kesalahan-kesalahan.](#)
- Undang-undang Kecil 4. [Memasukkan anjing atau binatang.](#)
- Undang-undang Kecil 5. [Menjerat atau membunuh binatang dan burung adalah dilarang.](#)
- Undang-undang Kecil 6. [Kereta melebihi dua tan dilarang.](#)
- Undang-undang Kecil 7. [Meletak kereta sembarangan dilarang.](#)
- Undang-undang Kecil 8. [Kelakuan tidak sopan.](#)
- Undang-undang Kecil 9. [Penutupan taman.](#)
- Undang-undang Kecil 10. [Kuasa merampas.](#)
- Undang-undang Kecil 11. [Menuntut balik barang rampasan.](#)
- Undang-undang Kecil 12. [Bayaran-bayaran.](#)
- Undang-undang Kecil 13. [Penalti.](#)

Mukadimah.

PADA menjalankan kuasa-kuasa yang diberi oleh Seksyen 102 (f) Akta Kerajaan Tempatan 1976 [Akta 171], Majlis Daerah Kemaman membuat, dan menurut seksyen 103 Akta tersebut Pihak Berkuasa Negeri mengesahkan, undang-undang kecil yang berikut:

Undang-undang Kecil 1. Nama, pemakaian dan mula berkuatkuasa.

Undang-undang kecil ini bolehlah dinamakan **Undang-undang Kecil Taman (Majlis Daerah Kemaman) 1992** dan hendaklah dipakai hanya bagi kawasan Majlis Daerah Kemaman dan hendaklah mula berkuatkuasa pada tarikh disiarkan dalam *Warta*.

Undang-undang Kecil 2. Tafsiran.

Dalam undang-undang kecil ini melainkan jika kandungan ayatnya menghendaki makna yang lain-

"Majlis" ertinya Majlis Daerah Kemaman;

"kereta motor" ertinya tiap-tiap kereta yang digerakkan oleh jentera yang terdapat di dalamnya dan dibina atau disesuaikan supaya boleh digunakan di atas jalan dan termasuklah trailer;

"taman" termasuklah kawasan lapang, siar-kaki di tasik, taman rekreasi atau hiburan, bulatan, batasan tengah sepanjang jalan, sisian jalan, jalan rizab, anak sungai, sungai, tebing sungai atau mana-mana perkarangan yang disenggara atau di bawah bidangkuasa Yang Dipertua;

"struktur" ertinya apa-apa rumah, pondok, bangsal, gerai, papan tanda, khemah, warung, meja, tiang, tiang sandar, tempat berteduh, kepungan beratap atau apa-apa sambungan atau apa-apa bangunan lain dari apa-apa jua bahan;

"Yang Dipertua" ertinya Yang Dipertua Majlis Daerah Kemaman dan termasuklah Timbalan Yang Dipertua.

Undang-undang Kecil 3. Kesalahan-kesalahan.

Mana-mana orang yang di dalam mana-mana taman yang:

(a) mengalih atau merosakkan apa-apa notis atau undang-undang kecil yang dipamerkan di dalamnya;

(b) membawa bersama-samanya atau menampalkan atau menegakkan apa-apa bil, pelekat, notis, panji-panji, bendera atau iklan pada atau di atas sesuatu tembok, pokok, pagar atau struktur;

(c) menggunakan apa-apa pelaung, penguatsuara, sistem siaraya atau lampu tumpu;

(d) mengalih, memindah, merosakkan atau mencacatkan mana-mana tempat duduk, perkakas, tempat permainan kanak-kanak atau lain-lain peralatan;

(e) menempatkan, melonggok atau membuang atau menyebabkan atau membenarkan ditempatkan, dilonggokkan atau dibuangkan apa-apa debu, abuk, kertas, abu, bangkai binatang, sampah, kotak, tong, bungkusan atau lain-lain artikel, atau menjatuhkan, menumpahkan, atau menabur apa-apa abuk, pasir, tanah, batu kelikir, tanah gembur, batu, rumput, jerami, ketaman, abuk papan, sampah kebun, sampah kandang ternakan, sampah perdagangan, baja, sampah sarap, atau apa-apa benda atau bahan lain daripada kereta yang bergerak atau tidak bergerak atau dengan apa-apa cara lain atau membuang, meninggalkan apa-apa botol, gelas, tin, pembalut makanan, sisa-sisa makanan atau apa-apa artikel atau barang lain;

(f) memanjat mana-mana tembok, pagar, struktur atau pokok;

(g) menunggang atau memandu basikal atau kereta motor di atas mana-mana rumput atau lorong pejalan kaki;

(h) berjalan di atas batas bunga atau pokok-pokok ranik;

(i) memotong, mengalih, merosak atau memusnahkan mana-mana bunga, tempat duduk, tumbuh-tumbuhan atau pokok-pokok;

(j) mengalih mana-mana rumput atau mengorek mana-mana tanah;

(k) melontar atau membuang apa-apa batu atau lain-lain pelempar;

(l) mandi di dalam mana-mana kolam atau anak sungai kecuali di suatu tempat mandi yang ditetapkan oleh Majlis bagi maksud itu;

(m) mengalirkan atau menyebabkan dialir apa-apa benda buangan atau cecair buangan daripada mana-mana premis ke dalam sesebuah tasik atau anak sungai (dalam taman) dan yang mencemar atau mungkin mencemarkan tasik atau anak sungai itu;

(n) menggunakan sampan, atau memancing di dalam mana-mana tasik atau anak sungai kecuali dengan kebenaran bertulis daripada Yang Dipertua atau mengganggu dengan apa-apa cara akan aliran air daripada mana-mana tasik yang melepahi alur air;

(o) memasang api atau membakar bunga api atau mercun atau melepaskan tembakan dari apa-apa senjata api atau senapang angin dengan tiada sebab yang sah tanpa mendapat kebenaran bertulis daripada Yang Dipertua terlebih dahulu;

(p) bermain layang-layang atau apa-apa permainan bola kecuali di tempat-tempat yang diperuntukkan dengan nyata bagi permainan itu;

(q) berumur lebih daripada 12 tahun, menggunakan apa-apa perkakas tempat permainan kanak-kanak;

(r) membasuh atau mengeringkan sesuatu atau menepuk apa-apa permaidani atau tikar;

(s) menegakkan apa-apa struktur tanpa mendapat kebenaran bertulis daripada Yang Dipertua terlebih dahulu;

(t) mendedah untuk jualan atau menjual apa-apa barang, benda atau makanan atau minuman kecuali di tempat-tempat dan pada masa-masa yang diluluskan oleh Yang Dipertua;

(u) bersyarah atau menyampaikan apa-apa ucapan di hadapan khalayak ramai atau berkumpul di dalam taman bagi maksud mengadakan atau mengambil bahagian dalam apa-apa mesyuarat agama, politik atau apa-apa mesyuarat lain atau mengadakan sesuatu tunjuk perasaan tanpa mendapat kebenaran bertulis daripada Yang Dipertua terlebih dahulu;

(v) menggunakan apa-apa bahasa yang lucah atau sumbang atau berkelakuan lucah atau sumbang;

(w) menghalang Yang Dipertua atau mana-mana pegawai yang diberikuasa secara bertulis olehnya dalam menjalankan tugas-tugasnya;

(x) menjaga atau membasuh kereta motor tanpa mendapat kebenaran bertulis daripada Yang Dipertua terlebih dahulu;

(y) menggunakan apa-apa benda atau alat yang mengeluarkan bunyi yang mana boleh mengganggu dahulu;

(z) menggunakan apa-apa benda atau alat yang akan menimbulkan sesuatu keadaan merbahaya kepada orang ramai.

adalah melakukan suatu kesalahan.

Undang-undang Kecil 4. Memasukkan anjing atau binatang.

(1) Tiada seorang pun boleh menyebabkan atau membiarkan mana-mana anjing atau binatang lain kepunyaannya atau di dalam jagaannya masuk atau berada di dalam sesuatu taman kecuali anjing yang bertali atau di bawah pengawalan yang sempurna.

(2) Di mana suatu notis telah ditempelkan oleh Majlis melarang kemasukan anjing ke dalam sesuatu taman, tiada seorang pun boleh menyebabkan atau membiarkan mana-mana anjing kepunyaannya atau yang di dalam jagaannya masuk atau berada dalam taman itu.

Undang-undang Kecil 5. Menjerat atau membunuh binatang dan burung adalah dilarang.

(1) Tiada seorang pun boleh menjerat atau membunuh apa-apa binatang atau burung di dalam sesuatu taman atau memiliki dalam sesuatu taman apa-apa alat atau alatcara untuk menjerat binatang atau burung.

(2) Majlis atau mana-mana pegawai yang diberikuasa secara bertulis olehnya atau pegawai polis boleh mensita alat atau alatcara daripada mana-mana orang didapati berada dalam taman itu.

Undang-undang Kecil 6. Kereta melebihi dua tan dilarang.

Tiada kereta motor selain daripada kepunyaan Kerajaan atau Badan-badan Berkanun, yang mempunyai berat muatan lebih daripada dua tan boleh memasuki sesuatu taman tanpa kebenaran bertulis daripada Yang Dipertua.

Undang-undang Kecil 7. Meletak kereta sembarangan dilarang.

Tiada kereta motor atau basikal boleh diletak di mana-mana tempat dalam sesuatu taman kecuali di suatu tempat yang disediakan untuk meletak kereta motor atau basikal.

Undang-undang Kecil 8. Kelakuan tidak sopan.

(1) Mana-mana orang yang didapati berkelakuan dengan cara tidak sopan dalam sesuatu taman adalah melakukan suatu kesalahan.

(2) Mana-mana orang yang melakukan apa-apa perbuatan yang menyalahi mana-mana peruntukan undang-undang kecil ini boleh diperintahkan keluar dari sesuatu taman oleh Yang Dipertua atau mana-mana pegawai yang diberikuasa secara bertulis olehnya atau pegawai polis dan boleh tidak dibenarkan masuk kemudiannya.

(3) Mana-mana orang yang enggan mematuhi perintah di bawah perenggan (2) boleh diusir keluar dari taman itu dengan menggunakan kekerasan yang berpatutan.

Undang-undang Kecil 9. Penutupan taman.

Majlis boleh menutup sesuatu taman atau mana-mana bahagian daripadanya pada bila-bila masa.

Undang-undang Kecil 10. Kuasa merampas.

Yang Dipertua atau pegawai Majlis yang diberi kuasa secara bertulis olehnya atau pegawai polis boleh merampas apa-apa struktur, alat perkakas, kereta motor dan basikal kepunyaan mana-mana orang yang melanggar peruntukan undang-undang kecil ini dan meletak barang-barang itu dalam simpanan Majlis atau tanggungjawab pemunya.

Undang-undang Kecil 11. Menuntut balik barang rampasan.

(1) Apa-apa struktur, kereta motor, basikal atau alat perkakas yang dirampas di bawah undang-undang kecil ini boleh dituntut daripada Majlis dalam tempoh 14 hari dari tarikh rampasan dengan membayar sesuatu denda yang ditetapkan oleh Yang Dipertua atau mana-mana pegawai yang diberikuasa olehnya secara bertulis.

(2) Sekiranya tiada tuntutan dibuat dalam tempoh 14 hari dari tarikh rampasan, maka barang-barang yang dirampas boleh dilelong atau dihapuskan oleh Majlis.

(3) Apa-apa pendapatan dari penjualan barang-barang yang dirampas itu hendaklah menjadi hasil Majlis.

Undang-undang Kecil 12. Bayaran-bayaran.

Majlis boleh dari masa ke semasa dengan kelulusan Pihak Berkuasa Negeri menetapkan bayaran-bayaran masuk kepada sesuatu taman oleh orang awam.

Undang-undang Kecil 13. Penalti.

Mana-mana orang yang bertindak melanggar mana-mana daripada peruntukan undang-undang kecil ini adalah melakukan suatu kesalahan dan apabila disabitkan boleh dikenakan denda tidak lebih daripada dua ribu ringgit atau penjara selama tempoh tidak lebih daripada satu tahun atau kedua-dua denda dan penjara dan mengenai kesalahan yang berterusan sejumlah wang tidak lebih daripada dua ratus ringgit bagi tiap-tiap satu hari dalam masa kesalahan itu berterusan setelah disabitkan.

Diperbuat oleh Majlis Daerah Kemaman di dalam mesyuarat pada 27 Mei 1992.
[MDK. 1202 SJ 13.]

AHMAD BIN SAID,
Yang Dipertua,
Majlis Daerah Kemaman

Disahkan oleh Pihak Berkuasa Negeri di dalam mesyuarat pada 5 Disember 1992;
[SUK. TR. 1200/367/SKE; PUN. TR. (S) 85/3/13.]

OSMAN BIN MUDA,
Setiausaha,
Majlis Mesyuarat Kerajaan,
Negeri Terengganu